

2 Korin

1 ¹Pol, Negur nē oroya bunem Kristus Jesus nē aposel wō aun, neda turada Timoti ado, pas enei Negur nē sios Korin bun ado, tamo kayau fateul ganan Akaia provins bun dibodok bun matotof.

²Tamada Negur ado Odug Jesus Kristus neid wau ifenēya ado wau inosiya, ā bun ibodōf.

Wau Yo Fiya Ganana Nē Negur

³Negur, neda Odug Jesus Kristus Tama, wau yūya nē Tama, wau yo fiya ganana nē Negur yana talesauf, ⁴ī neda morō ganana bun wauda yo fedig, anī nigin, ada dug wau yo fiya Negur bun tamal talen anī bunem, idi morō adodo anidi waud yo tafedig. ⁵Kristus nē darau gogūf, ada namedan isif gen, neda wau yo fiya anīg Kristus bunem gogū felef. ⁶Amā darau malef are, anī āgenei wauī yo fiya nigin ado, kel gei yeīya nigin. Amā waumā yo fef are, anī āgenei wauī yo fiya nigin, anī bunem darau de tekelei amāg malef anī, ā faali gef ulegef. ⁷Ā nigin nemā waumā iseya totol ifaref, ere nigin, amā keleī, are ā nemā darau walegef gen, ā nemā waumā yo fiyag walegef.

⁸Turamā tar, darau amā Asia provins bun malen anī, ā to keleī youf anī, to oromak. Amā morō faali fiya kisi feleya sā bagai bun mabodon, anī nigin, amā mata ibodōya nē kisig matoron. ⁹Momoi, amā waumā bun, es fiya tamo kot bun taka laa foug ye di, kisi fedig gen, kisi mafen. Anī ere, amā mug bun to mafar fen, Negur tamo gare den anidi kel turī fedidig ī bun mafarauf nigin enei wō yen. ¹⁰Ī laa nē waila ado kafī fiya age fiya bun tamal yalelnaman, anī nigin, ī fau yalelnamāf. Ī toku yalelnamāf nigin waumā iseya ī bun manon. ¹¹Are ā, āgenei kosēya bunem usennamāge di, Negurem age foug. Negur ī musei neid kosēya solof fen, wau ifenēya nē ege luwa ifanamāf nigin, museim amā nigin Negur de difiyēf.

Pol Iyōya Nē Delē Falei Yen

¹²Amā mug nigin seli yabiya are yeir: Nemā kisi es fiya bun kurō fesif, are amā tenebur ein, Negur nē fateul ado momoi bunem, ā bun bagai

age mafedig. Amā tenebur ein bouwa buru isennēya nē kisi biya bunem to age mafedig, anī ere, Negur nē wau ifenēya bunem age mafedig.

13-14 Amā ereb ā uweseg fen, ā keleī anī wal fiya to matotkeneik. Gama ā amā nigin naal keleī, anī ere, ā amā nigin keleī bagai youf anī oromak, anī bunem amā Odug Jesus nē naa bun ā nigin seli malesauf gen, āg amā nigin selimā walesagauf.

15 Aya enei momoi bagai agef wō youf au fen, ā sain uru el fiya walogouf nigin, ā ket ki yeīya anī kisi afen. 16 Aya Masedonia provins ileyā nigin asi, ki ayei ken, Masedonia ele fen, anenem ā gein baban kela asi di, ā aya Judia distrik ileyā nigin sur wiyagauf nigin kisi afen. 17 Sain aya enei kisi afen, aya karika bagai age afen de? Aya, tenebur nē tamo kayau age difedig gen, nameun “Sā” au fen, sigoroum “Yo” auf de?

18 Anī ere, Negur ī age afouf ye fen, agef bagai dō fedig gen, nemā od ā gein isif are yo ye fen, sāya sā. 19 Ere nigin, Negur Naal, Jesus Kristus ī nigin, aya, Sailas Timoti ado geid ā atun wogō mayeīdig anī, ī sain tekelei bun, yo ye fen, to sā yedig, anī ere, ereb ī yo yef anī, ī faimud agef dōf kisi feledig. 20 Ereb Negur age afouf yen od anī ganān Kristus bun yoya dogol. Anī nigin, ī bunem ada Negur bun fula fiya medeīya tarousiyouf nigin, sigoradam “Momoi” taudig. 21 Negurem, amā ado ā, Kristus bun total tafarauf nigin age fef. Ī igirnada fen, ada bun mouf fi fel fen, 22 ī, ada yogon nigin, ada bun yogon uris ino fen, ī wauda bun, ereb isiyouf anī momoi bagai isiyouf ye fen, yogon Awa Uur iben.

23 Negur ī aya nigin keleī bagai nigin, ī neu od megeir fe fen, isennēdidig, ī aya isennauf nigin aweignek, are aya ā nigin wauī ina fen, morō ifeneīya ator ken, Korin to kela asin. 24 Amā āgenei momoiya nugo fiyēya nigin to age mafef, anī ere, amā ā wauī al fouf nigin ā geid kabī malef, ere nigin, momoiya bunem ā total ufaregef.

2 1 Anī nigin, aya ā gein morō ado baban to ki ayeīf nigin, neu kisi afon. 2 Ere nigin, aya ā wauī morō afeneīf are, aim anī aya wau al fiya ifanauf, are ā aya morō afenein anim dogol sā de? 3 Aya enei bagai nigin atotkenein, are sain aya asiyouf bun, idi aya wau al fiya difanauf anidi bun, aya morō to alouf nigin age afen. Aya enei momoi auf, are sain aya wau al fef, ā ganāneg wauī al fef. 4 Aya morō odug ado wau gudū fiya bun, inā odug ado atotkenein, are aya ā morō afeneīf nigin to age afen, anī ere, ā bun neu wau laa fiya odug bagai anī, ā keleī youf nigin age afen.

Mosor Tamo Nē Mosor Nigin Weder Tu Keleya

5 Tamo anim morō ifenen ouf are, ī aya morō to ifanan, anī ere, ī ā ganān morō sau fiya ifenein. Aya total bagai to arōf nigin ‘sau fiya’ auf. 6 Ā musei ganānem ī darau wenēgen are, ī nigin kisi feleya. 7 Age fiya ban, gama ā in mosor wedereī tu kel fen, ī wau yo gouf, anī bunem, ī

wau gudū fiya fatuk bagaim to kuroub fiyēf. ⁸Anī nigin, aya ī āgenei wauī laa fiya baban ufelnēgouf nigin totol od arokeneik. ⁹Aya, pas bun ā atokkenein, ere nigin, aya ā kisi ayeī di, ā ereb ereb ganān bun neu od dō gouf anī ailāuf nigin age afen. ¹⁰Ā taka nē mosor nigin wedereī tu kalāuf are, ayag in mosor nigin wederou tu kalāuf. Ereb taka weder tu keleya nē ibodō di, aya wederou tu kelen, are aya āgenei biya fiya nigin, Kristus mala bun wederou tu kelen, ¹¹are Satanem ada to wal fada fen, bilā youf nigin age afen. Ere nigin, ada yogon kisi keleī.

Bar Itenēya Mata Nē Kabī Tamo Tar

¹²Sain aya Kristus nē biya od wogō auf nigin Troas taun ele fen, Odug ī aya nigin sukar kā fel mog ailen, ¹³aya fau nameun wau inosiya san, ere nigin, aya turau Taitus an to ailen. Anī nigin, aya idi dabuo afiyeīd fen, Masedonia provins elen.

¹⁴Anī ere, Negur de mafiyēf, ī faimud amā Kristus bun kusī wal fiya bun uyu iroukanamādig, agef fen, ī, amā bunem, Kristus nigin keleī anī nē sumeī biya, modoū ganān bun firagagaū feledig. ¹⁵Ere nigin, amā idi kel gei fedif anidi ado idi isaikalauf anidi atun, Negur mala bun, Kristus nē sumeī biya. ¹⁶Taka bun amā laa nē sumeī, taka bun amā mata ifenēya nē sumeī biya. Aim anī kabī age fiya yaleya kisi feleya? ¹⁷Amā, musei idi Negur nē od nigin moni mala kabī daledig gen sā. Age fiya ban, Kristus bun, amā, tamo Negurem sur fedin gen, Negur mala bun momoi nē bunem wogō maudig.

3 ¹Amā baban yanamā yaleseya nigin gariya manof de? Amā, tamo tunī age difedig gen, kabī biya daledig nē isennēya pas, amam ā gein sur mafouf be, āgem amā bun sur gouf de? ²Ā aug anī, nemā pas, are waumā bun itoton, age fe di, tamo ganān keleī ken, diwesedig. ³Ā aug anī, Kristus nē pas, nemā kabī nē kau anī yaor gef, itoton are ink bunem sā, are mata ibodkeleya Negur nē Awa Uur bunem, meein fadaleya bun sā, are tamo waud bun.

⁴Amā enei morok, ere nigin, amā Kristus bunem, Negur nigin momoiya ado. ⁵Amā ereb taka amā mug bunem isif yeya kisi feleya sā, anī ere, amā nemā kisi feleya Negur bunem isif. ⁶Negur ī amāg bar itenēya mata nē kabī tamo wōya kisi feleya inenaman, are lo itotoya nē sā, Awa Uur nē, ere nigin, lo itotoya anim idenkesidig, anī ere, Awa Uur im mata ifenēdidig.

Bar Itenēya Mata Nē Fula Fiya Medeīya

⁷Kabī laa irou isidig, are meein bun gegē itoton anī fula fiya medeīya ado isin, anī nigin, Israel tamo kayau yogon fula fiya medeīya nigin meleid dē yel fen, Moses nē nawa lo feleya kisi feleya san, anī ere, fula fiya medeīya anī komomor fen. Kabī age fiya fula fiya medeīya ado isin

ouf are, ⁸Awa Uur nē kabī nē fula fiya medeīya anim lo nē fula fiya medeīya anī to wal foug de? ⁹Tamo neid mosor nigin bouweid bun od yūdig nē kabī anī, fula fiya medeīyauf are, kabī madur bagai irou isidig in fula fiya medeīya nē odug naig fiya bagai! ¹⁰Ereb kulu fula fiya medeīya yenen, are gama nē fula fiya medeīya odug bagai nigin, kulu nē are sa kelen. ¹¹Ereb komomor falauf nē anī, fula fiya medeīya ado isin ouf are, faimud ibodkeleya nē fula fiya medeīya, yogon odug naig fiya bagai!

¹²Anī nigin, amā waumā iseya age fiya ado nigin, amā wogōya bun tuninirya sā. ¹³Amā Moses gen sā, ī yogo nawa bun lalan komomor fe mog, Israel tamo kayau to dilouf nigin, yogo nawa bun gabar dede fedig. ¹⁴Anī ere, idi neid kisi totolen, are sain enei bun, bar itenēya tubu iweseya bun gabar de anim fau ibodok. Gabar anī fau yaleleya sā ibodok, ere nigin, Kristus bun dogol anī yaleleyauf. ¹⁵Sain enei buneg, Moses nē itotoya iweseya bun, gabar dogo neid waud dede fedig. ¹⁶Anī ere, erob sain taka ī Odug bun falei youf are, gabar are lelek felef. ¹⁷Gama, Odug ī Awa Uur, Odug nē Awa Uur ibodok nē an, are katī feleya taka sā. ¹⁸Anī nigin, ada ganan, nawada bun gabarem dede fiya sā are, Odug nē fula fiya medeīya tail fen, ada bun so fe di, ada ī gen falei fada di, neda fula fiya medeīya odugef iledig, are Odug bunem isidig, ī anī Awa Uur.

Mis Namen Safina Biya Bagai

4 ¹Anī nigin, amā Negur nē wau yūya bunem kabī enei ado nigin, amā waumā bun to folo redig. ²Anī ere, amā inokōya ado mama nē naab matoron, amā to madeg ken, Negur nē od to falei mafeledig. Anī ere, amā momoi nē anī yaor mafe fen, Negur mala bun, tamo ganan dogo neid kisi es fiya bun, amā mug nigin yanamā iseledig. ³Amā nemā biya od dede fiyauf are, idi inanakalauf nē anidi bun dede fedif. ⁴Teneub enei nē waitou, idi momoiya sā anidi neid kisi ifofakelen, anī nigin, Kristus ī anī Negur nē malakanon, yogon fula fiya medeīya nē biya od anī nē lalan, idi ileyā kisi feleya sā. ⁵Amā, amā mug nigin to wogō maudig, anī ere, Jesus Kristus ī Odug mau fen, amā Jesus nigin āgenei ferfer maudig. ⁶Negur ī iron, “Gugum namen lalan fula fei,”^a yen, inim Kristus nē nawa bun yogon fula fiya medeīya anī, amā keleī youf nigin, yogon lalan waumā bun fula foug nigin inon.

⁷Anī ere, amā nameman mis namen gen, safina biya bagai enei ado, are erob erob ganan wal fiya nē megeir, are amā nemā sā, Negur nē anī yaorouf nigin. ⁸Amā siri ganan bun total bagai lai difamak, anī ere, narī famāya sā; erob taka age mafoug nigin neneya difanamak, anī ere, amā waumā folo reya sā; ⁹darau difanamak, anī ere, to folō famalef; didenamā dirarak, anī ere, daū famaleya sā. ¹⁰Amā faimud Jesus nē laa

^a 4:6 Jenesis 1:3

anī, bouwamā bun faali ma mayōdig, are Jesus nē matag bouwamā bun yaorouf nigin. ¹¹Amā mata mabodok, anī ere, faimud Jesus nigin laa bun dinenamādig, are yogon matag nemā laa nē bouwamā bun yaorouf nigin. ¹²Anī nigin, laa, amā bun kabī yaledig, anī ere, mata, ā bun kabī yaledig.

¹³Negur nē Itotoya eig yef, “Aya momoi aun, anī nigin, aya wogō aun.”^b Momoiya de tekelei anī nē kisi bunem, amāg momoi mauf, anī nigin, amāg wogō mauf, ¹⁴ere nigin, amā keleī, Negur ī Odug Jesus laa bun tamal kel turī fen anim, amāg Jesus geid kel turī fama ken, amā ā geid in mala bun inenadauf. ¹⁵Enei ganan are, āgenei biya fiya nigin, anī bunem, wau ifenēya anī tamo kayau bun kaka fef ile di, dogo neid Negur de fiyēya gogū fef anim, Negur fula fiya medeīya ifenēf.

¹⁶Anī nigin, amā waumā to folo redig. Amā bouwamā buru foinenem ilumuk iledig, anī ere, amā nameman naa ganan bun mataya tobol fe iledig. ¹⁷Nemā karika ado sain modeg nē morō anim, faimud ibodkeleya nē fula fiya medeīya, are morō anī ganan fatuk bagai wal fiya anī, amā malouf nigin kabī yaledig. ¹⁸Anī nigin, ada ereb maladam tailef ani to lo tafalauf, anī ere, ereb maladam to tailef anī lo tafalauf. Ere nigin, ereb tailef, are sain tobega nē, anī ere, ereb to tailef, are faimud ibodkeleya nē.

Saa Tanon Ibodōya Nē Bouwa

5 ¹Ada keleī, tenebur nē salafat ada anī namen tabodōdig anī narī foug are, ada fō taka Negur bun tamal ado, are saa ilun oun faimud ibodkeleya nē fō, are tamo imam inoya sā. ²Gama ada fō enei bun tabod ken, osi taudig, age tafe fen, saa ilun neda ibodōya modoū bunem ifounnadauf nigin wauda fatuk irōdig, ³ere nigin, ada saa tanon ibodōya nē bouwa ifounnadauf sain bun, ada gemū to diledauf. ⁴Ada salafat enei bun tabod mog, morō faali tafe fen, osi taudig, ere nigin, ada salafat enei lelek fel kanadauf nigin to orodadig, anī ere, saa ilun neda ibodōya modoū bun ifounnadauf nigin orodadig, anī bunem, ereb laa nē anī, mata anim itob lauf. ⁵Negur ī enei nigin bagai ada inoda fen, ada wauda bun, ereb isiyouf anī momoi bagai isiyouf ye fen, Awa Uur iben.

⁶Anī nigin, ada faimud kisi total ado fen keleī, are ada bouwada buru ado tabodok sain anī bun, ada Odug weim to tabodōdig. ⁷Ada momoiya bunem tabodōdig, ereb maladam tailef bunem sā. ⁸Aya arok, ada kisi total ado fen, ada bouwada enei tator ken, Odug geid takai tabodōf nigin orodaf bagai. ⁹Anī nigin, ada bouwada buru ado tabodok be tatorok be, ī wau al foug nigin ada kisi tatenēf. ¹⁰Ere nigin, ada ganan Kristus nē es fiya sia wagen wō tauf bagai, are mugu mugu, ereb biya be sane be, ada bouwada buru ado tabod ken, age tafan anī kilei, yogon mala solo yalouf.

^b 4:13 Sam 116:10

Komo Fiya Nē Kabī

¹¹Amā Odug anini fiyēya anī keleī nigin, amā tamo waud yaleya nigin age mafedig. Amā naig fiya anī Negur keleī bagai, age fiya gen, amā nigineg āgenei kisi es fiya bun yaorouf nigin, aya wau irok. ¹²Amā ā bun baban yanamā yaleseyā nigin to age mafef, anī ere, ā amā yanamā walesagauf nigin sain mafeneik, anī bunem, idi ereb waud bun ibodok anī fotokar, ereb meledim dilef anī nigin yeneid dalesedig anidi bun, ā solof irōya kisi feleya. ¹³Amā wadā idenamāf, are Negur nigin. Amā kisi biya adouf, are ā nigin. ¹⁴Kristus nē wau laa fiya anim amā toli famādig, amā kisi mafef, tekeleim ganān nigin laa fen, anī nigin, yogon laa bun, ganān gare den. ¹⁵Ī ganān nigin laa fen, anī nigin, idi mata dibodok anidi dogo nigin to dibodōf, anī ere, ī idi nigin laa fe di, kel turī fiyen anī nigin dibodōf.

¹⁶Anī nigin, gama einenem ilef ganān, ada tamo nē kariya bunem taka to keleī youf. Ada kulu naab enei bunem Kristus kelein, anī ere, ada baban to age tafedig. ¹⁷Anī nigin, taka ī Kristus bun ibodok, Negur ī yale, mata bagai inon. Tubu are ilele di, mata anī isin. ¹⁸Enei ganān Negur bun tamal, ī Kristus bunem ada ī geid komo fada fen, komo fiya nē kabī anī ada ifanadan. ¹⁹Are Negur ī tamo nē mosor idi bun to iwes fen, Kristus bun tenebur tamo kayau ī geid komo fedin. Agef fen, Negur ī komo fiya nē od ada bun inon. ²⁰Anī nigin, amā Kristus nē soosi tamo, are Negur ī yogon wau irōya, amā bunem wogō yedig gen. Amā Kristus fotokar ā magoneik, Negur geid komo gouf. ²¹Negur ī, ada nigin ye fen, Kristus mosor sā anī, mosor ī bun inon, are ī bunem, ada Negur nē madur bagai wowā taur nigin age fen.

6 ¹Negur nē kabī tura tar amā, ā total bagai marokeneik, are Negur nē wau ifenēya walegen anī, ege to aaluwan ilauf. ²Ere nigin, Negur ī irok,

“Neu wau ifenēya sain bun, aya ō karī ayon,
kel yaleya nē naa bun, aya ō asennon.”^c

Aya ā arokeneik, gama eī Negur nē wau ifenēya nē sain, gama eī kel yaleya nē naa.

Pol Nē Morō

³Amā taka delē ilauf bun ye to tū fouf nigin meein to manodig, are nemā kabī yana sane to ilauf nigin age mafedig. ⁴Age fiya ban, amā, naab ganān bun, amā Negur nē kabī tamo bagai ya anī mafelnēdidig, are feseya sā ifareya bun, darau, morō, wau morō bun, ⁵didenamak bun, kalabus bun, kusī bun, kabī total bun, bō mulaī itorōya bun ado,

^c 6:2 Asaia 49:8

naū bun, ⁶karētut bun, keleī bun, molol bun, dor yaleya bun, Awa Uur Fateul bun ado, wau laa fiya bagai bun, ⁷momoi nē wogō bun, Negur nē megeir bun, madur bagai nē willa ima biyalē ado ima kilē bun, ⁸tunī yanamā dalesedig ado tunī to yanamā dalesedig bunem, yana sane inoya ado yana biya inoya bunem; amā momoi marok, anī ere, amā idegēya tamo gen kisi difedig; ⁹idi amā nigin keleī, anī ere, keleī sã gen kisi difedig; gare mauf, anī ere, amā mata mabodok; didenaman, anī ere, to didenamakesin; ¹⁰waumã gudū fef, anī ere, faimud waumã kulī yedig; maleg, anī ere, musei safina kisi feleya manenēdidig; ereb taka sã, anī ere, ereb ereb ganan ado.

¹¹Korin tamo kayau, amā karika wogō mayein. Age ma fen, amā ā bun waumã sukar fatuk bagai kã mafen. ¹²Amā nemã waumã laa fiya ā bun to mafokeledig, anī ere, āgenei wauī laa fiya amā bun ufokelegedig. ¹³Aya neu kesu tar bun gen ā wogō ayeik, ā solog fen, wauīg sukar fatuk bagai kãg.

Momoiya Sã Geid To Bagu Gouf

¹⁴Momoiya sã geid to bagu gouf. Madur bagai sane ado naig de nigal dūf? Lalan gugum ado ere bunem nigal dūf? ¹⁵Kristus Satan ado naig fe di, waud tekelei youf? Ere anī momoiya ado, momoiya sã atun tekelei? ¹⁶Negur nē tempel, idegēya waitou atun, ere mamad katō fiya ado? Are ada mata ibodōya Negur nē tempel. Negur iron kilei, “Aya idi geid mabod ken, idi atun ayōf, age afe fen, aya idi neid Negur ouf, age afe di, idi neu tamo kayau ouf.”^d

¹⁷“Anī nigin, utornēdig fen,
fire ufareg,
Odug irok.
Ereb amuyē ado to kobūg,
ago ge di, aya ā aleyeif.”^e

¹⁸“Aya āgenei temeī di,
ā nau kesu tar, nau barai tar ouf,
Odug saa ilun nē kusī tamo guri feid uyu iroudig anī irok.”^f

7 ¹Ā neu oboiyou, ada Negur age afouf yen od enei ado nigin, ada dug ereb ereb ganan bouwa ado uur amuyē ifenēdig anī lilik tafe fen, Negur anini fiyēya bunem fateul bagai wō tauf.

Pol Nē Kulīya

²Āgenei wauī bun, amā nigin modoū unog. Amā aib taka bun to kū mafenen, amā aib taka sane bun to manenen, amā aib taka idegnēya

^d 6:16 Levitikas 26:12; Jeremaia 32:38; Esekiel 37:27 ^e 6:17 Asaia 52:11; Esekiel 20:34, 41 ^f 6:18 2 Samuel 7:14; 7:8

bunem ereb ereb to son mafen. ³Aya ā bouweī yūya nigin od enei to wogō auf. Ere nigin, aya mogo oron, are āgenei ibodōya modoū, amā waumā bun ado nigin, amā ā geid mata tabodōf be, gare tauf. ⁴Aya ā nigin fatuk bagai momoi au fen, fatuk bagai ā yeneī alesef. Aya wau fatuk bagai yalesef, nemā morō ganan bun, neu wau kulīya gogū felef.

⁵Sain amā Masedonia masin, nemā bouwamā enei si inoya san, anī ere, amā siri ganan bun darau difanaman, serē kiwai difanamā mog, nameman kumī ado. ⁶Anī ere, Negur ī waud morō adodo waud yo fedidig, Taitus isin bunem ī waumā yo fen. ⁷Are, in isin bunem dogol sā, anī ere, wau yo fiya ī wenēgen anī bunem ado. Ā aya uleyagauf nigin bagai oroyein, ereb wō yen anī nigin āgenei awaun yeya odug fen, ā aya nigin kisi fatuk bagai walegedig anī ī irokanaman, anī bunem, neu kulīya odug bagai iselen.

⁸Aya neu pas bunem wauī gudū fiya afenein, anī nigin, aya uruwa bun awaun aun. Anī ere, gama aya anī nigin to awaun auf, ere nigin, aya ailef, are neu pas anim, sain naal bagai dogol wauī gudū fen. ⁹Anī ere, gama aya wau al fef, are wauī gudū fiya afenein anī nigin sā, anī ere, āgenei wauī gudū fiya anim, wauī faleiya bun irouleyein nigin. Ere nigin, ā Negur nē oroya kilei wauī gudū fen, anī nigin, amā ā daū fiya to mafenein. ¹⁰Wau gudū fiya Negur nē orof kilei anī, wau faleiya irousi, kel yaleya bun irouledig, anī nigin, ada to awaun taudig, anī ere, tenebur nē wau gudū fiya laa irousidig. ¹¹Negur nē wau gudū fiya eneim, ā bun faat yun anī ulogouf, are ereb totol bagai wauī irōdig, morō wō yen anim to lai yeif nigin ereb ā aug madur gedig, ereb sane nigin seye gedig, ereb Negur nigin anini gedig, ereb taka nigin bagai oroyeidig, ereb kabī totol walegedig, ereb sane age fen bun mala solo wenēgedig. Ereb ereb ganan bun, ā aug enei nigin kū fenēya taka sā anī yaor gen. ¹²Anī nigin, aya ā bun atoton are, taka ī sane age fen be, takam ī bun sane age fen anī nigin sā, anī ere, ā amā nigin naig ge wauī wanamāgef anī, Negur mala bun aug ulogouf nigin age afen. ¹³Enei ganan nigin amā waumā yo fef.

Amā waumā yo fiya anī teten, amā Taitus ī fatuk bagai wau al fen anī mail fen, fatuk bagai waumā al fen, ere nigin, yogon uur ā ganan bunem filolō fen. ¹⁴Aya ī bun yeneī alesen, age afe di, ā aya mama to wanagen. Anī ere, ereb amā wogō mayein anī ganan momoi, age fiya gen, amā Taitus bun yeneī malesen areg, momoi anī yaoren. ¹⁵Ā ganan ī dōg fen, aniniya ado tererēya bunem ī walegen anī, ī kisif fen, ā nigin yogon wau laa fiya mugi bagai ilen. ¹⁶Aya, ereb ereb ganan bun, ā nigin, sā momoi auf nigin, wau al fef.

Wau Ifenēya Bunem Kolekta Inoya

8 ¹Turamā tar, amā, ā wau ifenēya Negur Masedonia sios ifenēdin anī keleī youf nigin oromak. ²Idi morō odug bagai dale fen, maleg bagai

dibodon, anī ere, idi neid waud kulīya mugī ado bun, idi isennēdiya nigin kolekta moni musei difenēdin. ³Aya kurō afeis eig au arokeneik, idi ifenēdiya kisi feleya ado, anī wal fesiyag difenēdin. Dogo neid oroyam, ⁴idi Negur nē tamo kayau isennēdiya kabī amā geid malouf, are dem de fen, anī nigin totol bagai dirokanaman. ⁵Age dife fen, idi, amā idi nigin kisi mafen kilei, to age difen, anī ere, idi anī wal fiya age difen. Idi dogo anī ketem Odug difen ken, anī dumen Negur nē oroya dō de, idi dogo amā difanaman. ⁶Anī nigin, amā Taitus totol bagai marokenen, ī uruwa bun gariya inon nigin, wau ifenēya nē kabī enei ā buneg bure falauf nigin marokenen. ⁷Anī ere, ā ereb ereb ganan bun, momoiya bun, wogō bun, keleī bun, wauī adok irōya ganan bun, āgenei wauī amā nigin laa fiya bun, kisi feleya ago gef gen, wau ifenēya nē kabī enei buneg ā kisi feleya ago gouf.

⁸Aya ā ago gouf bagai nigin sii fiya to afeneik, anī ere, aya sios tunī kabī totol dalef anī bunem, āgenei wauī laa fiya anī, momoi be sā be anī es ayeif. ⁹Ere nigin, ā neda Odug Jesus Kristus nē wau ifenēya keleī, are ī safina kisi feleya, anī ere, ā nigin ī maleg wō yen, are yogon maleg bunem ā safina kisi feleya wō gouf nigin, ī age fen.

¹⁰Aya enei nigin neu kisi, āgenei biya fiya nigin afeneik. Yar tubu bun, ā ket wenēdigen anī dogol sā, ā ago gouf nigin wauī iseya anīg adon. ¹¹Gama kabī anī udikalagauf, anī bunem, ā ago gouf nigin, āgenei oroya totol bagai ibodon gen, ā safina kisi feleya kilei kabī anī bure walagauf. ¹²Oroya anī an ibodōf are, Negur ereb tamo taka safina ado kilei anī yalouf, ereb tamo taka safina sā bunem sā.

¹³Amā nemā oroya, tunī waud karika ifenēdi di, ā wauī morō ifeneik anī sā, anī ere, ganan kisi kisi feleya ibodōya nigin oromak. ¹⁴Sain enei bun, āgenei ereb ereb musei anim, ereb idi lau difef anī gadō gouf, anī bunem, dogo neid ereb ereb musei animeg, abag ereb ā lau gef anī gadō difouf, age dife di, kisi kisi feleya ubodōgouf, ¹⁵are Negur nē Itotoya eig ye irok kilei, “Taka ī safina musei kuru fen, ī musei bagai to yalen, taka ī naal kuru fen, ī to lau fen.”^g

Taitus Korin Sur Difiyen

¹⁶Aya, Negur ī, kisi aya ā nigin ado kisi de tekelei, Taitus nē wau bun inon nigin, Negur de afiyek. ¹⁷Ere nigin, Taitus ī, nemā od ā ki yeīya nigin anī, de ye fen, ī yogon wau irōya odug bagai ado, yogon oroyam ā gein isif. ¹⁸Amā, turamā taka biya od bun yogon kabī nigin, sios ganan yana dalesedig anī, Taitus ado sur mafedif. ¹⁹Enei dogol sā, turamā ī anī, wau ifenēya nē kabī enei bun, amā geid mayok malauf nigin, siosem digirnen, kabī are, amā Odug bun fula fiya medeīya marousiyouf nigin

^g 8:15 Eksodas 16:18

ado, amā nemā isennēdiya nigin waumā irōya mafelnēdiyof nigin kabī malef anī. ²⁰Amā, wau ifenēya bunem ege luwa musei dinon enei, lo ma mog, tunī anī nigin od sane to dirōf nigin oromak. ²¹Ere nigin, amā Odug mala bun ado, tamo meleid buneg, ereb madur bagai anī age mafouf nigin lo mafedig.

²²Amā, turamā taka, idi geid sur mafedif, ī amā sain musei es mafiye ken, ī ereb ereb musei bun kabī totol yaledig anī mailedig, ī ā nigin fatuk bagai momoi yef nigin, ī gama isennēdiya nigin kabī totol yaleya orib yef. ²³Taitus nigin, ī neu tā tar taka, ī ā nigin neu kabī turau; nemā turamā tar nigin, idi sios neid arū tamo, Kristus bun fula fiya medeīya dirousidig. ²⁴Anī nigin, āgenei wauī laa fiya nē kaū ado, amā ā yeneī malesedig anī nē gariya nē kaū, tamo eneidi ufelndigouf, anī bunem, sios idi anī dilouf.

9 ¹Ā mogo keleī nigin, aya Negur nē tamo kayau bun kabī enei nigin baban to atokeneīf. ²Ere nigin, aya isennēdiya nigin āgenei wauī irōya totol anī keleī ken, Masedonia tamo kayau bun yeneī alesedig, are yar tubu bun tamal isi, gama ā Akaia an isennēdiya nigin dodok gen anī arokenēdi di, isennēdiya nigin āgenei wauī irōya totol anim, idi musei waud fā yen. ³Anī ere, aya turau tar sur afedin, are amā ā yeneī malesedig anī enei bun ege to ilauf, anī ere, ā aya aron gen dodok gouf nigin, age afen. ⁴Ere nigin, Masedonia tamo tunī aya geid masi fen, ā dodok fiya sā anī dilouf are, amā ā nigin momoiya age fiya ado nigin mama malouf, āg mama yeīf nigin ereb od taka sā. ⁵Anī nigin, aya kisi afen, aya turau tar totol bagai arokenēdi di, idi ketem ā gein dile fen, ā wau ifenēya nē ege luwa musei wenēdigouf urōgen anī nigin dodok fiya bure difalauf, are deuf, aun. Age dife di, wau ifenēya nē ege luwa dodok fyauf, are nugo yeīya bunem ege luwa inoya sā.

Wau Ifenēya Bunem Safina Ifenēya

⁶Enei karī walagauf, aib taka faat musei sā irarak, ī musei sāg kusu fouf, aib taka faat musei irarak, ī museig kusu fouf. ⁷Tamo mugu mugu, ereb yogon wau bun ifenēya nigin kisi ifon anī ifenēf, are wau morō bunem sā, takam nugo fiya bunem sā, ere nigin, Negur ī tamo wau kuliya bunem ifenek nigin wau laa fef. ⁸Negur ī wau ifenēya ganā ā kisi feleya bagai ifeneīya kisi feleya, are ereb ereb ganā bun, ā faimud ereb ā kisi fen, lau gef anī ganā waleg fen, kabī biya ganā kisi feleya bagai ago gouf nigin age fef. ⁹Negur nē Itotoya eig ye irok kilei:

“Ī yogon safina firagagaū feid fen, maleg ifenēdin;
yogon madur bagai faimud ibodkalauf.”^h

¹⁰Negur ī, faat irarāya tamo, faat ado yōya nē bret ifenēdig, ī āgenei faat irarāya nigin ifen ken, musei inouf, agef fen, ī āgenei madur bagai nē

^h 9:9 Sam 112:9

kusu fiya odug inouf. ¹¹ Negur ī ereb ereb ganan bun, ā safina ado inoyeif, anī bunem, ā sain ganan wau ifenēya bunem musei wenēdigouf, ago ge di, idi amā bunem āgenei ege luwa dale fen, Negur de difiyēf.

¹² Kabī enei ā walegedig anim, ereb Negur nē tamo kayau lau difef anī nigin dogol to isennēdif, anī ere, ago ge di, musei idi Negur de difiyek buneg gogū felef. ¹³ Kabī ā walegedig anī bunem, ā aug nigin yaor gen, anī nigin, tamo idi Negur yana dalesauf, ere nigin, ā Kristus nē biya od kurō wesig fen, anī dōg fen, ā wau ifenēya bunem idi adok ganan bun musei wenēdigen. ¹⁴ Age de fen, ā nigin idi neid kosē bun, dogo neid waud ā bun isiyouf, ere nigin, Negur ī wau ifenēya ereb ereb ganan wal fiya anī ā ifenein. ¹⁵ Negur nē ege luwa dir feleya kisi feleya sā anī nigin, Negur de tafiyēf!

Pol Yogo Ne Kabī Nigin Isennēya Od

10 ¹ Aya, Pol, tunī dirōdig, aya ā geid tabodok sain bun, are yukeleya dedig, aya ā geid to tabodok sain bun, are total od irōdig dedig, aya Kristus nē imatkesiya ado molol nem eig au, ā arokeneik. ² Aya asiyouf sain bun, aya tunī amā teneub enei nē lo fiya bun mabodōdig dedig anidi bun, aya total od arōf nigin kisi afef gen, to age afouf nigin, aya ā agoneik. ³ Momoi, amā tenebur ein mabodok, anī ere, amā kusī nigin, tenebur ein age difedig gen to age mafedig. ⁴ Amā nemā kusī nē waila are, teneub enei nē sā, anī ere, idi kau total narī fiya nigin Negur nē megeir ado. ⁵ Amā, monēya ado, ereb ereb ganan Negur nigin keleīya nē naabura gudū fiya nigin yogo iselef anī, narī mafedidig, age mafe fen, amā kisi ganan male fen, Kristus dō fiya nigin marouledidig. ⁶ Sain ā, āgenei dō fiya ganan bun, kisi feleya bagai wō gouf, amā fe temeleid ganan darau ifenēdiya nigin dodok mafef anī kisi falauf.

⁷ Ā ereb ereb teten nē anī dogol lo gedig. Taka ī yogo nigin Kristus nē ye fen, anī nigin total bagai momoi youf, amāg ī gen Kristus nē anī, ī baban kisi fouf. ⁸ Aya, ā daū yeīya ban yalesneīya nigin Odug yana ifanaman anī nigin, yanau naal yaor afe alesaufeg, aya anī nigin to mama fiyauf. ⁹ Aya neu pas bunem, ā kumī ifeneīya nigin age afef gen, ā kisi gef anī to orouf. ¹⁰ Ere nigin, tunī dirōdig, “In pas are morō ado fen, total ado, anī ere, ī amā geid mabodok sain bun, ī maleg le fen, yogon wogō are ege iledig.” ¹¹ Tamo age fediya idi keleī youf, amā ā geid to tabodok sain bun, nemā pas bun amā naig be fiya anī, amā ā geid tabodok sain bun, amā de dō maf, age mafouf bagai.

¹² Amā, tunī dogo neid yeneid dalesedig idi geid, kerē sā dede to mauf. Idi dogo, dogo nigin dogo bun fele dife fen, dogo nigin dogo bun es difef anidi, idi kisi biya sā. ¹³ Anī ere, amā yanamā to daū wal ma fen, malesauf, anī ere, amā kabī Negur igirkanaman bun dogol yanamā malesauf, kabī are ā buneg ilef. ¹⁴ Amā yanamā gerō bagai to males

maroulef, amā ā gein to masim are, amā yanamā gerō bagai males maroulem, ere nigin, amā Kristus nē biya od ado, ā geineg masin. ¹⁵Amā tunim kabī dalen anī bun to daū wal mafe fen, yanamā malesedig. Nemā waumā iseya are eig fiya, āgenei momoiya odugef iseie di, ā atun amā nemā kabī akor fatuk bagai bilalaū fef ilauf, ¹⁶anī bunem, amā āgenei akor wal mafesil fen, biya od wogō mauf. Ere nigin, amā tamo taka nē akor bun kabī dalen anī nigin, yanamā yaleseya to oromak. ¹⁷Anī ere, “Taka ī yana yalesef, ī Odug bun yana yalesauf.”ⁱ ¹⁸Ere nigin, taka ī yogo yana yalesef nigin, Negur to de yedig, anī ere, taka ī Odugem yana yalesef anī, Negur de yedig.

Pol Idegēya Aposel Geid

11 ¹Ā aya utornag len, neneya od naal wogō auf nigin aya wau irok, anī ere, ā mogo yeir ago gef. ²Aya ā bun Negur nē kiyeī bunem kiyeī afeneik. Aya ā aiweī tekelei, Kristus bun agirnein, are aya ā kayau taulei bagai gen, ī gein arouliyeif nigin age afen. ³Anī ere, Eva gogourem ed fe idegnen gen, āgenei kisi sane le di, ā āgenei wauī bun, Kristus bun āgenei momoiya ado kisi karētut utorōg fen, sane lauf nigin, aya kumī auf. ⁴Takam ā gein isi fen, Jesus taka nigin, amā wogō mayein anī nigin gen sā, wogō youf be, ā uur fire, uur ā walegen gen sā anī walogouf be, ā biya od fire, biya od ā walegen gen sā anī walogouf are, ā anī karika bagai karī wedigedig. ⁵Anī ere, aya kisi afef, aya aposel yeneid odug anidi farumen to bagai abodok. ⁶Aya wogōya nigin biya sā be, anī ere, aya keleī ado. Amā, enei, ā bun naab ganan bun, ereb ereb ganan bun yaor mafen.

⁷Aya yug nigin aukesil fen, Negur nē biya od mala sā ege bagai wogō ayein bunem, ā alesnein anī mosor de? ⁸Aya ā aruneī yaleya nigin, sios tunī bun tamal isennaya alen anī, sios tunī idi bun tamal bē alen gen. ⁹Takag, sain aya ā geid tabod ken, ereb taka nigin lau afen, aya ā taka to morō afenein, ere nigin, turau tar Masedonia bun tamal disin idi, ereb aya lau afen kisi feleya bagai difanan. Ereb ereb ganan bun, aya yug ā morō ifeneīya ator ken, toku age afouf. ¹⁰Kristus nē momoi anī, aya nameun ibodok nigin, taka nem Akaia provins bun neu yanau yaleseya enei to katī falauf. ¹¹Ere nigin? Aya ā nigin wau laa fiya sā nigin de? Negur ī keleī, aya ā nigin wau laa fedig! ¹²Aya ereb ereb nigin idi yeneid dalesedig anī bun, amā idi geid tekelei ya anī karī douf nigin orodidig anidi neid naabureid gudū fiya nigin, ereb aya age afef anī, toku age afouf. ¹³Ere nigin, tamo age fediya are idegēya aposel fen, idegēya kabī tamo, idi Kristus nē aposel neweid dale fen, kabī daledig. ¹⁴Are terēya sā, ere nigin, Satan ī yogo bagai fula fiya nē engel nawa yaledig. ¹⁵Anī nigin,

ⁱ 10:17 Jeremaia 9:24

Satan nē kabī tamo idi, madur bagai nē kabī tamo neweid dalouf are, to terē tauf. Idi neid didikalauf bun, idi age difedig kilei dalouf.

Pol Yogon Kabī Nigin Morō Musei Yalen

¹⁶Aya baban arok, taka nem aya nigin neneya tamo to youf. Anī ere, ā ago gouf are, aya neneya tamo gen waleyag, anī bunem, ayag yanau naal alesauf. ¹⁷Aya yug yanau yaleseya enei bun, aya Odug gen to wogō auf, anī ere, neneya tamo gen wogō auf. ¹⁸Musei idi, teneub enei nē tamo kayau age difedig gen, yeneid dalesedig nigin, ayag yanau alesauf. ¹⁹Ā kisi biya bagai ado nigin, ā wauī al fiya ado neneya tamo karī wedigedig! ²⁰Ere nigin, taka nem ā ferfer ineneik, ereb ereb ganan bun ā kadir ineneik, idegēya bun yaleyeik, yogo yana yaor falaisi ilun iselef be, weleī fā fef bun, ā karī wiyēgedig. ²¹Aya momoi eig au arok nigin mama fiyaf, are amā felu reya bagai nigin to age mafedig!

Anī ere, taka ī total ino fen, ereb taka nigin yana yalesauf are—aya neneya tamo gen wogō auf—ayag total ano fen, yanau alesauf. ²²Idi Hibru tamo de? Ayag anī. Idi Israel tamo de? Ayag anī. Idi Abraham nē ibor nē tubu tar de? Ayag anī. ²³Idi Kristus nē kabī tamo de? (Aya wadā gen eig au wogō auf.) Aya idi wal fediya. Aya idi wal fediya kabī aledig, aya kalabus bun idi wal fediya abodōdig, aya idi wal fediya wagī difiyadig, age de fen, aya laa bun baba baban dinenan. ²⁴Juda idi aya sain faif bun teti nain wagī difiyan. ²⁵Sain towo bun, aya tibogem wagī difiyan, sain tekelei bun, aya meinem dinan, waag aya abodon sain towo sanen, aya, bō taka ado gaa taka ado, maaī atun abodon. ²⁶Aya toku ayok bun, kuwei sane waila wal afen, bē tamo nē waila wal afen, neu fō turau tar geid kiwai wal afen, haiden geid kiwai wal afen, taun bun kiwai waila wal afen, gerere tuan kiwai waila wal afen, maaī bun waila wal afen, idegēya turau tar nē kiwai waila wal afen. ²⁷Aya kabī total ale, morō ado fen, sain musei mulaī to ainēdig. Aya naū ado naan ail fiya fen, sain musei saaf sā aledig. Aya menig fiya fen, gemū abodōdig. ²⁸Ereb ereb ganan anī sirin, aya naa ganan bun, sios ganan nigin suwēya morō anim lai fiyadig. ²⁹Aib felu re di, aya to felu rauf de? Aib mosor bun iroule di, aya to wau morō fiyauf de?

³⁰Aya yanau yaleseya nigin bagai youf are, aya ereb ereb neu felu reya anī yaor fedig anī nigin yanau alesauf. ³¹Odug Jesus nē Dei, Negur, ī anī yana faimud yaleseya, ī keleī, aya to adegek. ³²Damaskus oun, gawaman nē mudur, King Areta farumen ī, aya yaleya nigin taun bobog bun lo fiya tamo inenēdin. ³³Anī ere, aya karam kuren dinena fen, kau mosokoronem folo folō difiya di, yogon iman tamal ulō aran.

Pol Nē Mala Seleulā Kurā Fiya Ado Yogon Kudag Kereuk Fiya

12 ¹Aya yanau alesef alauf. Ereb mala to aloufeg, aya Odug bunem malau seleulā kurā fen ado, kurō fesiya od alen anī wogō auf

alauſ. ²Aya tamo taka^j Kristus bun ibodok anī keleī, ī kulu yar fotin ilelen bun, Negurem yale, saa tano towo bun irou iselen. Ī bouwa ado be, bouwa sã be, aya keleī sã, Negur keleī. ³Aya keleī, tamo enei-ī bouwa ado be, bouwa sã be, aya keleī sã, anī ere, Negur ī keleī- ⁴ī paradis bun irou iselen. Ī ereb ereb tamom faded feleya kisi feleya sã, tamom wogōya nigin katū fiyen anī karī yen. ⁵Aya tamo age fiya anī yana alesauf, anī ere, aya yug nigin yanau to alesauf, aya neu felu reya nigin dogol yanau alesauf. ⁶Aya yana yaleseya nigin agirīfeg, aya neneya to abodōf, ere nigin, aya momoi anī wogō auf. Anī ere, aya yana yaleseya nigin atorok, are taka nem ereb aya age afef be, wogō auf anī wal fe fen, aya nigin fatuk to kisi foug nigin age afef.

⁷Kurō fesiya odug bagai enei alen anī bunem, aya yug yanau yaleseya katī feleya nigin, bouwa bun kudag ifanan, Satan nē arū tamo darau ifanauf nigin bouwa bun yun, are aya yug yanau yaleseya katī feleya nigin. ⁸Sain towo, Odug aya bun anī yalelkanauf nigin, aya ī agonen. ⁹Anī ere, ī irokanan, “Neu wau ifenēya ō nigin kilei bagai, ere nigin, neu megeir felu reya bun kisi feleya bagai wō yef.” Anī nigin, aya fatuk bagai wau al fiya bun neu felu reya nigin yanau alesauf, are Kristus nē megeir aya bun ibodōf nigin age afouf. ¹⁰Anī nigin, Kristus nigin, aya felu reya bun, kono fiya bun, wau morō bun, darau bun, morō bun, wau kulī yedig. Ere nigin, sain aya felu rauf bun, aya total adodig.

Pol Korin Tamo Kayau Nigin Suwē Yen

¹¹Aya yug nigin neneya tamo wō aun, anī ere, ā aya nugo wiyage di, aya age afen. Ā aya nigin yanau walesegem, are dem, ere nigin, aya ege, anī ere, aya aposel yeneid odug farumen to bagai abodok. ¹²Aya ā atun abod ken, ereb aposel bagai nē anī, uris, ereb urug bagai ado, memelik, morō ganan bun, feseya sã anodin. ¹³Aya sios ganan bun age afedig anī, ā buneg age afen, anī ere, ereb tekelei dogol ā bun to age afen, are aya ā isennaya nigin morō taka to afenein anī dogol. Neu kū fenēya enei nigin wedereī tu kel!

¹⁴Gama aya eneim sain towo ki ayeīf nigin saika afef, aya ā isennaya nigin morō to afeneīf, ere nigin, ereb aya orouf are, āgenei safina sã, ā aug anī. Kesum sina tama nigin moni to kuru difedig, anī ere, sina tamam nedi gereneid tar nigin age difedig. ¹⁵Anī nigin, aya wau al fiya odug bun, neu safinau ganan ā nigin araile fen, aya yugeg arailauf. Aya ā nigin wau fatuk afeneī di, ā aya nigin wauī naal bagai wanagauf de? ¹⁶Ā tunī aya nigin urōgedig, ‘Ī amā masennēf nigin morō to ifanaman, anī ere, ī idegēya keleī bagai, idegēya kor bunem gei famādig,’ gedig. ¹⁷Aya tamo susur afedin anidi taka bunem, ā adegnei ken, āgenei safina

^j 12:2 Tamo taka anī, Pol yogo nigin irok.

alen de? ¹⁸Aya Taitus ā gein ileya nigin totol bagai aroken ken, aya amā turamā ī ado sur afedin. Taitus ī to idegnei ken, safineī yalen, ī age fen de? Amā kisi tekelei bun age mafe fen, naab tekelei dō mafen, anī sā de?

¹⁹Ā sain enei ganān, amā mug isennamāf nigin ā bun age mafedig be, kisi gedig. Amā, Negur mala bun, tamo Kristus nigin momoi def anidi gen, wogō maudig. Ā nemā oboimā, ereb ereb ganān amā age mafef, are ā megeir walogouf nigin. ²⁰Sain aya asiyouf, aya ā nigin kisi afef gen to ailiyeīya nigin be, ā aya nigin kisi gef gen to uleyageya nigin, aya kumī auf. Ā bun an, kusī, kiyeī, seyeya, fara fiya, ne tā bou yūya, dumen od irōya, aya aya yeya be, ekul ge ufaregeya nigin, aya kumī auf. ²¹Sain aya baban asiyouf, neu Negur ā meleī bun aya mama ifana di, musei kulu mosor dino fen, amuyē, noli tobonunā fire fire ado, bouwa nē oroya nigin totol sane wau fāya bunem waud to falei difen anidi nigin, aya wau gudū fouf nigin kumī auf.

Idikeleya Nē Weder Irouya Od

13 ¹Eneim sain towo ā gein asif. “Od ganān isennēya urom be, towom sigoredim kurō difesiyouf anī megeir gouf.”^k ²Uruwa aya asi fen, baban asi ā geid tabodon sain bun, aya wedereī irouya od arokeneī bure afelen. Gama aya ā geid to tabod ken, anī ket, idi uruwa mosor dinodin anidi geid tunī ganān arokeneik: Aya kelau asiyouf sain bun, idi to loloum afediyouf, anī ere, kafī fiya afenēdiyof, ³ere nigin, ā Kristus ī aya bunem wogō yef anī ileya oroyeik. Ī ā bun kabī yaleya nigin to felu ref, anī ere, ī ā atun megeir ado. ⁴Ere nigin, momoi bagai, ī felu reya bun aa tetek bun dun, anī ere, ī Negur nē megeir bunem mata ibodok. Age fiya gen, amāg ī bun felu reya, anī ere, Negur nē megeir bunem, amā ī geid mata mabodōf. Age mafe fen, amā Negur nē megeir ā atun yaor mafouf.

⁵Ā momoiya bun ubodōgef be sā be anī, ulogouf nigin ā aug es gouf. Ā aug kisig uleg. Kristus Jesus ī, ā bun ibodok anī ā to keleī de? Sāf are, momoi bagai, ā es fiya bun kubū gef. ⁶Anī ere, amā es fiya bun to kubū maun anī ā ulogouf nigin, aya momoi auf. ⁷Ā ereb sane taka to ago gouf nigin, amā Negur bun kosē mauf. Are amā es fiya bun to kubū maun anī tamo kayau dilouf nigin sā, anī ere, amā es fiya bun kubū maun gen dilemāfeg, ā ereb madur ago gouf nigin. ⁸Ere nigin, amā ereb taka momoi anī to kiwai mafenek, anī ere, momoi nē nigin dogol age mafef. ⁹Amā felu mauf bun, ā megeir adof nigin, amā waumā al fef. Ā kisi feleya bagai wō gouf nigineg, amā kosē mauf. ¹⁰Gariya eig fiya nigin, aya ā geid to tabod ken, enei atotof, are sain aya asiyouf, aya neu yanau bunem totol od ā to arokeneīf nigin age afef, yanau are ā daū yeīya ban yalesneīya nigin Odug ifanan.

^k 13:1 Diuteronomi 19:15

Idikeleya Nē Aanya

¹¹Idikeleya bagai, turau tar, dabuo. Kisi feleya bagai wō gouf nigin ago gouf, aya neu wogō anī karīg, kisi tekelei waleg, wauī inosiya bun ubodōg. Ago ge di, wau laa fiya ado wau inosiya nē Negur ā geid ibodōf.

¹²Fateul umāya bunem, abob aan wiyēg. ¹³Negur nē tamo kayau ganan, nedi aanya ā bun sur difef.

¹⁴Odug Jesus Kristus nē wau ifenēya, Negur nē wau laa fiya ado, Awa Uur Fateul nē nigal yūya ā ganan bun ibodōf.